



Fedde ngam Bamtaare
Demngal Wolof e Muritani
(APROLAWORIM)



Fedde Bamtaare Pulaar e
Muritani (FBPM)



Fedde Muritaninaare
Bamtaare Demngal e Pinal
Sooninke (AMPLCS)

Kuutoragol demde ngenndiije nder Suudu sardi

Jokkorde pelle pine Pulaar, Sooninke e Wolof hono Fedde Bamtaare Pulaar e Muritani (FBPM), Fedde muritaninaare Bamtaare Demngal e Pinal Sooninke (AMPLCS), e Fedde Bamtaare Demngal Wolof nder Muritani (APROLAWORIM) ina ndewindii no feewi duko faatungo e kuutoragol demde nder Suudu Sardi (Asaambe). Nde tawnoo ko de pelle-baafal gardiide hare ngam keftingol timmungol demde ngenndiije dee, rewruude e laawdingol majje e kuutoragol majje nder denndaangal fannuuji nguurndam leydi ndii, alaa ko de mbaawi so wonaa weltaade e ngal taabal mawngal, so naatgol pulaar, sooninke e wolof nder parlemaa, rewruude e pirgol mum en timmungol nder arab, walla pirgol arab feewde e majje.

Kono tan, Jokkorde ndee ina yawi ngoldoo naatnugol demde ngenndiije e parlemaa hee sibu ko arab tan firetee e majje walla de piree e arab. «Kono firo woodani hakkunde pulaar e sooninke e wolof. Yanti heen, binndaade depiteeji dii ngollortoo dee mbinndaa tan ko e arab e farayse. Deen binndaade kala ina poti fireede e nder demde ngenndiije dee kala.

E min mbasiyoo Yiilirde Suudu sardi ngenndi ndee, nde ooñtata ko yaaccii ko ooñii heen koo fof, ngam rokkude naatnugol dee demde e nduu Suudu hormundu faayiida. Amin ciftina ndu kadi, so tawii kuutoragol demde ngenndiije dee wadiraawo ko rokkude denndaangal wootoobe muritaninaabe hakke faamde jeewte badeteede e suudu sardi nduu, ina himmi kadi deen demde mbadta huutoreede e tele parlemaa hee.

Ko buri duum boom, bayri ko depiteeji men teddufi dii lelnata laabi sariya, alaa ko hadi di sakkitde sariyaaji laawfinooji demde men ngenndiije pulaar, sooninke e wolof, kam e naattingol mum en nder tippudi nehdi e janje ngam gaddanaade biibe leydi ndii fof hakke waawde bamtaade e timmal, tawi ko e dooftaare keewal eddaaji ngenndi ndii.

Nuwaasoot, ñalnde 08/02/2020
Yiilirde Jokkorde ndee